

Na osnovu člana 55. Statuta Općine Ilijaš, prečišćeni tekst ("Službene novine Kantona Sarajevo", br. 20/09 i 46/18), člana 90. Poslovnika Općinskog vijeća Ilijaš ("Službene novine Kantona Sarajevo", broj 19/22) i potpisanog Uzvratnog pisma namjere-Razvojni program Ujedinjenih nacija (UNDP) u Bosni i Hercegovini, Projekt općinskog okolišnog upravljanja (MEG), broj: 01/2-21-1668-1/21 od 25.10.2021. godine, Općinsko vijeće Ilijaš na svojoj redovnoj 21. sjednici održanoj, dana 28.10.2022. godine, donosi

ODLUKU o uspostavljanju "Građanskog sata sa vijećnicima"

I

Ovom Odlukom uspostavlja se mehanizam komunikacije vijećnika Općinskog vijeća Ilijaš sa građanima, odnosno "Građanski sat sa vijećnicima" (u daljem tekstu građanski sat), definiše se pojam, uspostavljanje i način organizovanja Građanskog sata.

II

Građanski sat predstavlja mehanizam kojim građani neposredno komuniciraju sa vijećnicima Općinskog vijeća Ilijaš o pitanjima, inicijativama i problematici u zajednici, a vijećnici sa druge strane informišu građane o aktivnostima i planovima Općinskog vijeća Ilijaš.

III

Građanski sat se održava svakog radnog petka, ukoliko ima prijavljenih građana, u principu u periodu od 14,00 sati do 16,00 sati, uz mogućnost da vijećnik i građanin dogovore i neki drugi termin koji im odgovara.

Građanski sat se neće održavati u slučaju da je u navedenom terminu zakazano održavanje sjednice Kolegija ili Općinskog vijeća Ilijaš.

IV

Kolegij Općinskog vijeća Ilijaš, izrađuje plan učešća vijećnika u Građanskom satu, a koji će predsjedavajuća/i Općinskog vijeća Ilijaš usklađivati sa zahtjevima i potrebama građana.

V

Građani svoja pitanja, inicijative i primjedbe podnose putem propisanog Zahtjeva za prijavu na "Građanski sat sa vijećnicima u Općinsko vijeću Ilijaš" na pisarnicu Općine Ilijaš ili sekretaru Općinskog vijeća Ilijaš, lično ili putem e-mail adrese ov@ilijas.ba, najkasnije tri dana prije održavanja Građanskog sata, o čemu sekretar Općinskog vijeća Ilijaš obavještava predsjedavajuću/eg Općinskog vijeća Ilijaš.

Građani u svom Zahtjevu pored teme, moraju naznačiti i ime i prezime jednog ili više vijećnika Općinskog vijeća Ilijaš sa kojim žele razgovarati.

Ukoliko građani u svom Zahtjevu ne naznače ime jednog ili više vijećnika Općinskog vijeća Ilijaš sa kojim žele razgovarati, Kolegij Općinskog vijeća Ilijaš će odrediti vijećnika/e za taj Građanski sat.

VI

Vijećnik ima obavezu saslušati stranku i o tome lično sačiniti Zapisnik koji sadrži podatke koji se odnose na datum, mjesto i vrijeme održavanja građanskog sata, imena prisutnih, dnevni red i zaključak sa smjericama za rješavanje građanskog pitanja.

Zapisnik treba da bude potpisan od strane vijećnika i građana.

Zapisnik se obavezno dostavlja sekretaru i predsjedavajućoj/em Općinskog vijeća Ilijaš, a po potrebi dostavlja i općinskom načelniku Općine Ilijaš na mišljenje.

Vijećnici koji su održali sastanke sa građanima, zajedno sa predsjedavajućom/im Općinskog vijeća Ilijaš, analiziraju materijale sa održanih sastanaka.

Prijedloge građana predsjedavajuća/i Općinskog vijeća Ilijaš dostavlja Kolegiju Općinskog vijeća Ilijaš, radi procjene i eventualnog uvrštavanja u dnevni red sjednice Općinskog vijeća Ilijaš.

Građaninu će biti dostavljena povratna informaciju o poduzetim aktivnostima koje su rezultat Građanskog sata.

VII

Ova odluka stupa na snagu danom objavljivanja u "Službenim novinama Kantona Sarajevo".

Broj: 01/1- 02-2497-6/22
Ilijaš, 28.10.2022.godine

Predsjedavajuća OV-a Ilijaš

Alma Omerović, BA nov.

[Redacted signature]

